



Nuuk, 1. august 2014

Inatsisartut Suleriaasianni § 37 naapertorlugu Naalakkersuisunut imaattunik apeq-quteqarpunga.

Apeqqutit:

1.

Aningaasatigut pinerlunnernik qulaarsisinnaasunik Akileraarutissatigut tunngasutigut sunniuteqarluartumik iliuuseqarnissami inatsisitigut nutaamik allanguinertigulluunniit pilersitsineq pisariaqassanersoq Naalakkersuisut paasissutisseeqquneqarput. Naalakkersuisut isumaat naapertorlugu fagsystemit assigiinngitsut (akileraartarnermut, motorillit nalunaarsorsimaffiat eqqartuussiveqarfimmilu illuutit pigisat nalunaarsorsimaffiat) suleqatigiissinnisaat maanna inatsisit atuuttut iluanni pisinnaappat?

2.

Hashimik tuniniaaneq malitsigisaanillu pinerlunneq eqqarsaatigalugit, soorlu tamanna Naalakkersuisut 30. august 2011 akissutaanni nassuiarneqartoq, akileraarutissatigut tunngasutigut sunniuteqarluartumik iliuuseqassagaanni sutigut nukittorsaasoqarnissaanut Naalakkersuisut tulleriarilluni pingaarnersiunermet tunngatillugu nalileeqquneqarput.

(Inatsisartuni ilaasortaq Agathe Fontain, Inuit Ataqatigiit)

Tunngavilersuut:

Inatsisartuni ilaasortap Andreas Uldumip, Demokraatineersup, 2011-mi § 37 naapertorlugu inuit ingerlatsiviilluunniit hashimik tuniniaanermi akuusutut pasineqartut eqqarsaatigalugit akileraarutissatigut tunngavigisaannik nakkutilliinertigut periarfissat aporfiusinnaasullu eqqarsaatigalugit nunatsinni akileraartarnermut oqartussaasut politiillu suleqatigiinnerisa nukittorsarnissaannik Naalakkersuisut qanoq takorluugaqarnersut apeqputigivaa.

Naalakkersuisut akissummini ilisimatitsissutigivaat ¹, akileraarutissatigut iliuusissaq aningaasatigut pinerluttuliornermik paasissutissiinnaasumik, taamatullu inuit pineqartut pinerlunnerunngitsumik isertissimasinnaanngisaattut paasinarsitsinnaasumik "systemitigut ineriartortitsinissamik" annertuumik pisariaqartitsissasoq, tassa fagsystemet arlaliusut paasissutissaataannik ataatsimoortitsisinnaaneq anguneqarsinnaanngorlugu.

Taamatuttaaq Naalakkersuisut akissummini ersersippaat hashimik tuniniaanermi, taamatullu malitsigisaattut pinerlunnerit allat pinngorarneranni, iliuusissati-

¹ Apeqqut 156-2011. Akissut 30. august 2011-meersuuvoq, Sags nr. 2011-054326

gut annertusaanissatigut aporfissat akileraarternermut aqutsisoqarfimmi sulisut/nukissat killeqarnerannik patsiseqartut.

Apeqqutima tamakkerlutik ullut qulit iluini akineqarsimanissaat qinnutigaa.